



10. marts 2023

UPA 2023/146

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Namminersorlutik Oqartussat Naalagaaffillu aningaasatigut inissisimanerat immikkut sammillugu, Namminersorneq pillugu Inatsi kukkunersorneqarnissaa pillugu isumaqatiginninniarnissat aallartinnissaat anguniarlugu, Naalakkersuisut Rigsmyndighed attaveqarnissaat pillugu Inatsisartunut aalajangiiffigisassatut siunnersuut.**

(Inatsisartunut Ilaasortaq Jens-Frederik Nielsen, Demokraatit)

### **Tungavilersuut**

2008-mi Namminersorneq eqqunnissaanut innuttaasut taasitneqarmata amerlanerussuteqarluartut akuersipput. 2009-mi inuiattut ullorsiornitsinni namminersorneq eqqunneqarpoq. Namminersorneq pillugu partiinit akerliusoqarsimangilaq, kisiannili Demokraatiniit (ilaatigut Naamik/Nej atuakkami) aningaasatigut Danmarkimut isumaqatigiissutigineqarsimasooq pitsaanngippallaarnera aammalu Danmarkimut pitsaanerunera tungavilersuuteqarfigisimavarput<sup>1</sup>.

Piffissallu ingerlanerani aningaasatigut isumaqatigiissutigineqarsimasumut Demokraatiniit isornartorsiuisimanerput ilumoortoq takusinnaalersimavarput. Isumaqatigiissummi aningaasatigut inissisimaffik Kalaallit Nunaanni politikikkut ineriartornissatsinnut toqqaannartumik akimmiffilersuilersimavoq.

Namminersorneq pillugu Inatsimmi allaqqavoq Naalagaaffimmiit akisussaaffiit angerlaassat Kalaallit Nunaata ingerlatsinikkut namminneq akilissagaat. Siusinnaerusukkut imaassimavoq Kalaallit Nunaat akisussaaffik angerlaassaanut Naalagaaffimmut sipaarutaasut tapiissutigineqartartunut annertusaatigineqartassasut.

Allanguineq tamanna akisussaaffinnik angerlaassuinissatsinnut unittoortitsisoq ersareqqissaarpoq. Tamannalu ukiorpassuangortuni politikikkut nammineq aaliangersaasinnaanerulernissatsinnut annertusaannginnitsinnut kinguneqarpoq. Ineriartorneq tamanna killormut ingerlaneruvoq.

Piffissami tassani Kalaallit Nunaat sinnerlugu isumaqatiginninniartartut uuliamik nassaartoqarnissaa taakkunaniillu aningaasatigut isaatitsisoqarnissaa neriuuteqarfigineqarluarsimasooq Demokraatiniit eqqummaariffigaarput. Kalaallit Nunaata killeqarfiisa iluani uuliamik nassaartoqarsimagaluarpat aningaasatigut Namminersorneq pillugu isumaqatigiissut pitsaasuusimassagaluarpoq takusinnaavarput. Kingumulli qiviaraanni uuliamik nassaartoqarnissaanut tamakkersorsimaneq piffissami tassani politikkeriusimasuniit pipallataavallaarsimavoq.

---

<sup>1</sup> Naamik/Nej – Demokraatit 2008



Maannakkullu uuliamik nassaartoqarsinnaajunnaarpoq, Naalakkersuisummi maanna aaliangersimapput Kalaallit Nunaat nunarsuarmi kisiartaalluni uuliamik aningaasatigut iluanaaruteqassanngitsoq. Tamatumani equngasoqarujussuarpoq Namminersorluni isumaqatigiissuteqartuni illuatungerisaq Danmark uuliamik tunisassiornikkut milliardit koruunerpassuarnik isaatitsisoq.

Maani nunatsinni politikkikkut nammineq aaliangersaasinnaanerunissarput Demokraatiniit kissaatigaarput, taamaattumillu Naalagaaffimmiit akisussaaffinnik angerlaassuinissatsinnut aningaasatigut inissisimaneq akimmiffiunnginnissaa anguniarlugu Rigsmyndighed suleqatiginissaa pingaartuusooq isumaqarpugut.

Rigsmyndighd tungaanniit nutaamik isumaqatigiissusiortoqarnissaanut isumaqatiginninniarneq aningaasatigut ajornartussaangilaq. Aningaasatigut inissisimaffik eqqartortillugu Rigsmyndighed-mut apeqqutaanaviangilaq, Kalaallit Nunaanni akisussaaffimmik ingerlatsineq akilersorneqassanersooq imaluunniit tapiissuteqarnikkut aningaasat tunniunneqassanersut ingerlatsinermullu aningaasartuutiginaqit.

Naalakkersuisut partiillu sinnerisa siunnersuummut qanoq isumaqarnersut tusassallugu qilanaarpunga, neriullungalu siammasissumik ilalerneqassasoq.

#### **Pisortanut aningaasatigut allaffissornikkullu kingunissai**

Suliamik aallarnisaanermut attaveqarnermullu allaffissornikkut aningaasatigullu kingunisai ataatsimut isigalugu atorfillip ukiumut suliarisartagai imaluunniit 500.000 koruunit sinnernissaat naatsorsuutigineqanngilaq.

Pisortat allaffissorneranni sulisorisat amerlavallaareermata Naalakkersuisut aalajangiiffigisassatut siunnersuut piviusunngortinnissaanut aningaasat immikkoortinneqareersimasut nikisissinnaagaluarpaat. Tamanna tunngavigalugu ullumikkormit aningaasatigut kinguneqassanngikkaluarpoq.

#### **Namminersorlutik inuussutissarsiteqartunut aningaasatigut allaffissornikkullu kingunissai**

Soqanngilaq.

#### **Innuttaasunut aningaasatigut allaffissornikkullu kingunissai**

Soqanngilaq.